

BOSNA I HERCEGOVINA  
PARLAMENTARNA SKUPŠTINA  
PREDSTAVNIČKI DOM:  
Broj: 01-011-113/00.  
Sarajevbo, 17.05.2000.

## Z A P I S N I K

sa 20. sjednice Predstavničkog doma Parlamentarne skupštine  
Bosne i Hercegovine

Dvadeseta sjednica Predstavničkog doma održana je 8. i 17. maja 2000. godine  
Prvom dijelu sjednice, 8. maja, prisustvovala su 33 poslanika – 19 iz Federacije  
BiH i 14 iz Republike Srpske. Odsustvo su opravdali: Ivo Mijačević, zbog zdravstvenih  
razloga, Bogić Bogićević, Ljubomir Zovko i Zlatko Lagumdžija – zbog službenog puta.  
Bez najave odsustvovali su Edhem Bičakčić, Tarik Čaršimamović i Hamdija Kulović.

Predsjedavajući Pero Skopljak poslanike je obavijestio da je od OSCE-a dobio  
obavijest da je umjesto Nedžada Brankovića poslanički mandat dodijelio Rijadu Raščiću,  
kao i da je Safet Oručević podnio ostavku na dužnost poslanika.

Prije otvaranja rasprave o prijedlogu dnevnog reda predsjedavajući je Dom  
obavijestio da su predlagači Prijedloga poslovnika Pero Skopljak i Mirko Banjac kao  
poslanici.

U raspravi povodom prijedloga dnevnog reda učestvovali su Sejfudin Tokić,  
Rasim Kadić, Ibrahim Spahić, Mirko Banjac, Branko Dokić, Ivo Divković, Miodrag  
Deretić, Haris Silajdžić, Kasim Trnka – predstavnik Predsjedništva BiH, Vito Rakić i  
Nikola Špirić.

U diskusiji su izneseni sljedeći prijedlozi za izmjenu ili dopunu predloženog  
dnevnog reda:

- Sejfudin Tokić – da se u dnevni red uvrsti inicijativa za usklađivanje Ustava BiH  
sa Evropskom konvencijom o ljudskim pravima i osnovnim slobodama i o tome zatražio  
pojedinačno izjašnjanje;

- Rasim Kadić – podržao prijedlog g. Tokića. Prigovorio zašto u dnevni red nije  
uvrštena rasprava o ekonomskoj i socijalnoj politici, iako su četiri poslanika pokrenuli  
inicijativu još prije osam mjeseci. Podržao je uvrštavanje u dnevni red zakona koje je  
predložio g. Silajdžić, a predložio da se Analiza rada Nezavisne komisije za medije uvrsti  
poslije nacrt zakona, jer oni imaju prednost u odnosu na izvještaje, analize i dr.;

- Ibrahim Spahić – prigovorio zašto u dnevni red nije uvršten prijedlog programa  
rada za 2000. godinu i podržao prijedloge g. Tokića i Kadića u vezi sa inicijativama, kao i  
prijedloge zakona g. Silajdžića;

- Mirko Banjac – predložio da se sa dnevnog reda skine Nacrt krivičnog zakona  
jer nije usklađen sa čl. 3. Ustava BiH, kao i da se sa dnevnog reda skine tačka –  
Potvrđivanje imenovanja predsjedavajućeg Vijeća ministara iz razloga što sjednici nisu  
prisutni članovi Predsjedništva BiH;

- Branko Dokić je iznio protivljenje da se u dnevni red uvrštava bilo koje pitanje  
za koje poslanici nisu dobili materijal. Predložio je da se iz prijedloga dnevnog reda skine  
tačka 6. Nacrt zakona o sudu Bosne i Hercegovine;

- Ivo Divković . prigovorio što u dnevni red nije uvršten izvještaj o usaglašavanju Nacrta izbornog zakona BiH (predlagač: Klub poslanika SDP-a), koji je na 18. sjednici dobio većinu prisutnih, ali ne i entitetsku većinu;

- Miodrag Deretić - predložio skidanje Nacrta zakona o zaštiti ljudskih prava utvrđenih međunarodnim konvencijama koje su sastavni dio Ustava BiH (predlagač: poslanik Haris Silajdžić);

- Vito Rakić – predložo da se iz prijedloga dnevnig reda skinu tačke 5 – Nacrt zakona o zaštiti ljudskih prava..., tačka 6. – Nacrt zakona o sudu BiH i tačka 9. Nacrt krivičnog zakona BiH.

Poslije diskusije predsjedavajući je obrazložio činjenicu da predlagač Prijedloga poslovnika Predstavničkog doma nije Kolegij nego Paro Skopljak i Mirko Banjac kao poslanici, što je u skladu sa Privremenim poslovníkom Predstavničkog doma, po kojem Kolegij i ne može biti predlagač. Napomenuo je da će se poslanici izjasniti o prijedlogu dnevnog reda Kolegija i o svakom prijedlogu za dopunu ili izmjenu dnevnog reda.

Poslanik Haris Silajdžić je povukao iz prijedloga dnevnog reda nacrt: zakona o pravobranilaštvu BiH, zakona o tužilaštvu BiH, krivičnog zakona BiH, zakona o upravi BiH i zakona o upravnim sporovima BiH, dok od OHR-a ne stigne stručno mišljenje ili nacrti zakona.

Poslanik Ibrahim Spahić je povukao svoj i Kadićev prijedlog da se u dnevni red uvrsti rasprava o ekonomskoj i socijalnoj politici, sa zahtjevom da se ovo pitanje uvrsti na jednu od prvih sjednica. Takođe je povukao prijedlog da se u dnevni red uvrsti inicijativa za amandmansku izmjenu Ustava BiH, s prijedlogom da se ista razmatra na jednoj od narednih sjednica, u okviru programa rada.

Predsjedavajući je konstatovao da se Kolegij saglasio sa prednjim prijedlozima, pa je na izjašnjanje dao prvo prijedlog Kolegija, bez tačaka 6 – 11 (nacrti zakona koje je povukao poslanik Silajdžić).

Za predložene tačke, od 32 prisutna poslanika, glasalo je 20, a 11 je glasalo protiv. Glasajući po entitetima, ZA je glasalo 17 poslanika iz FBiH, a iz RS tri. Predsjedavajući je konstatovao da prijedlog nije usvojen, te je iznio prijedlog Kolegija da se obavi glasanje o svakoj tački posebno. Glasajući posebno o preostalim tačkama predloženog dnevnog reda, za 20. sjednicu Predstavničkog doma usvojen je sljedeći

### **D N E V N I R E D:**

1. Usvajanje zapisnika sa 17, 18. i 19. sjednice Predstavničkog doma,
2. Prijedlog poslovnika Predstavničkog doma (predlagači: Pero Skopljak i Mirko Banjac),
3. Imenovanje članova radnih komisija i
4. Odgovori na poslanička pitanja i pitanja poslanika.

Nisu usvojene sljedeće tačke iz prijedloga dnevnog reda:

- Potvrđivanje imenovanja predsjedavajućeg Vijeća ministar BiH (od prisutnih 32 ZA je glasao 21 poslanik, protiv 9. Iz Federacije BiH 18 je glasalo ZA, a iz RS ZA su glasala 4 poslanika, a 9 protiv;

- Analiza rada Nezavisne komisije za medije sa prijedlogom ispitivanja ustavnog osnova za njeno postojanje i daljnje funkcionisanje (predlagač Nikola Špirić). ZA ovaj prijedlog glasalo je 17, a protiv 12 poslanika. Glasajući po entitetima, iz Republike

Srpske 11 poslanika glasalo je ZA, a tri protiv. Iz FBiH ZA je glasalo 5, a protiv 11 poslanika. .

- Nacrt zakona o zaštiti ljudskih prava utvrđenih međunarodnim konvencijama koje su sastavni dio Ustava BiH (predlagač Haris Silajdžić). ZA prijedlog je glasalo 17, a protiv 15 poslanika – iz FBiH ZA 13, 4 protiv; iz RS ZA tri, 11 protiv.

Zatim se Dom izjasnio o prijedlogu S. Tokića, da se u dnevni red uvrsti Inicijativa za usklađivanja Ustava BiH sa Evrpskom konvencijom za zaštitu ljudskih prava i osnovnih sloboda. Glasanje je obavljeno prozivkom.

ZA prijedlog su glasali: Raifa Alagić, Mediha Filipović, Halid Genjac, Adnan Jahić, Rasim Kadić, Hilmo Neimarlija, Mustafa Pamuk, Haris Silajdžić, Ibrahim Spahić, Suada Muminagić, Sejfidin Tokić, Ibrahim Đedović, Ivo Lozančić, Smail Bećirbašić, Abdurahamn Malkić i Munira Karić.

PROTIV su glasali: Ana Havel, Ivica Pašalić, Pero Skopljak, Anita Mikulić, Mirko Baković, Radenka Balta, Dragan Mirković, Miodrag Deretić, Milenka Bošnjak, Branko Dokić, Branislava Jovanović, Vito Rakić, Mirko Banjac, Mara Perkanović, Desanka Rađević i Nikola Špirić.

Predsjedavajući je konstatovao da je ZA prijedlog glasalo 16, a protiv prijedloga 16 poslanika (iz FBiH ZA 13, protiv 5, iz RS ZA tri, protiv 11). Prema tome, prijedlog nije usvojen.

Poslanici su se izjasnili i o prijedlogu zaključka Mirka Banjca – da se pozove Predsjedništvo BiH da uzme učešća u radu Predstavničkog doma Parlamentarne skupštine BiH u vezi valstitiog prijedloga za potvrđivanje imenovanja predsjedavajućeg Vijeća ministara. Ovakav ignorantski odnos prema ovom veoma važnom pitanju štetan je po interese Bosne i Hercegovine.

Prijedlog zaključka nije usvojen. ZA je glasalo 14 od 28 prisutnih poslanika - iz FBiH tri, iz RS 11.

Povodom neizglasavanja prijedloženoig zaključka bilo je više diskusija i replika u kojima su učestvovali: Mirko Banjac, Halid Genjac, Haris Silajdžić, Branko Dokić, Sejfidin Tokić, Nikola Špirić, Ibrahim Spahić, Hilmo Neimarlija i Vito Rakić. Potom je nastavljen rad po usvojenom dnevnom redu.

### **Ad – 1: Usvajanje zapisnika sa 17, 18. i 19. sjednice Predstavničkog doma**

Povodom ove tačke diskutovala je poslanik Ana Havel i prigovorila da zapisnike nije stigla pročitati. Zamolila je da se ubuduće zapisnici dostavljaju barem dan ranije.

Uz ovu primjedbu Dom je usvojio zapisnike sa 17, 18. i 19. sjednice Predstavničkog doma. ZA je glasalo 26 od 29 prisutnih poslanika.

### **Ad 2: Prijedlog poslovnika Predstavničkog doma**

Poslanik Nikola Špirić je na početku rasprave o Prijedlogu poslovnika postavio pitanje predlagača Prijedloga poslovnika s obzirom da je to ranije bio Kolegij Predstavničkog doma, a danas su to samo dva člana Kolegija, gospoda Skopljak i Banjac. Naglasio je da se o amandanina na Prijedlog izjašnjavao kompletan Kolegij i pitao – da li sad o istim treba da se izjasni novi predlagač.

Predsjedavajući Pero Skopljak je odgovorio da smatra da se formalno-pravno može raspravljati o izvještaju predlagača o amandmanima jer su i sadašnja dva predlagača o istim raspravljali i glasali.

U daljoj diskusiji su učestvovali Ivo Divković, Suada Muminagić, Mirko Banjac, Ibrahim Spahić, Rasim Kadić, Ana Havel i Halid Genjac. Poslije diskusije data je pauza radi usaglašavanja oko određenih amandmana, a potom je sjednica prekinuta.

**Nastavak 20. sjednice** održan je 17. maja. Prisustvovala su 32 poslanika –18 iz Fedetracije BiH i 14 iz Republiek Srpske. Izostanak su opravdali Ivo Mijačević, Sejfudin Tokić, Anita Mikulić i Tarik Čarišimamović. Odsustvovali su i poslanici Edhem Bičakčić, Hamdija Kulović, Haris Silajdžić i Zlatko Lagumdžija.

Nastavak sjednice počeo je s radom u 11 časova, iako je bio zakazan za 14, a u 11 časova trebalo je da se održi 21. sjednica sa samo jednom tačkom dnevnog reda – Potvrđivanje imenovanja predsjedavajućeg Vijeća ministara BiH. Objašnjenje za promjenu termina tražio je poslanik Rasim Kadić, na što su odgovorili predsjedavajući Pero Skopljak i zamjenik predsjedavajućeg Mirko Banjac. Povodom ovog pitanja još su diskutovali Miodrag Deretić i Halid Genjac, a onda je nastavljen rad 20. sjednice.

Predjedavajući Pero Skopljak iznio je prijedlog Kolegija da prije nastavka rasprave o Prijedlogu poslovnika Predstavničkog Doma zakletvu pred Domom da' g. Snežana Savić, sudija Ustanog suda BiH, kao i da se verifikuje mandat novom poslaniku Rijadu Raščić. Poslanici su prijedlog Kolegija prihvatili.

Prof. dr Snežana Savić dala je zakletvu pred Predstavničkim domom, a poslije toga je Dom verifikovao mandat poslaniku Rijadu Raščiću, kojem je Privremena izborna komisija mandat dodijelila umjesto Nedžada Brankovića koji je podnio ostavku zbog inkopatibilnosti funkcija.

ZA verifikaciju mandata, od 27 prisutnih, glasalo je 25 poslanika – 15 iz Federacije i 10 iz Republike Srpske.

### **Ad – 2: Prijedlog poslovnika Predstavničkog doma** **(predlagači: poslanici Pero Skopljak i Mirko Banjac)**

Predsjedavajući je konstatovao da je rasprava o Prijedlogu poslovnika vođena na prvom dijelu sjednice i zapitao da li se može preći na izjašnjavanje o amandmanima. Međutim, poslanici su pokazali interes za daljnjom raspravom, pa je predsjedavajući otvorio diskusiju.

U diskusiji su učestvovali Ibrahim Spahić, Mirko Banjac, Rasim Kadić i Branko Dokić, a potom je predsjedavajući dao pauzu radi usaglašavanja.

Poslije pauze sekretar Predstavničkog doma Branka Todorović čitala je svaki podneseni amandman posebno i o svakom se Dom izjasnio.

Nakon izjašnjavanja o svim amandmanima Predstavnički dom je jednoglasno usvojio Poslovnik Predstavničkog doma Parlamentarne skupštine Bosne i Hercegovine.

### **Ad – 3: Imenovanje članova radnih komisija**

U kratkim diskusijama poslanici Halid Genjac i Ana Havel upoznali su poslanike da se radi o zamjeni članova Komisija iz SDA i HDZ-a umjesto ranijih poslanika koji su podnijeli ostavke na poslaničku dužnost.

Sa 25 glasova ZA (prisutno 26) u radne komisije Predstavničkog doma izabrani su:

- **Pero Skopljak** – za člana Komisijr o međunarodnim i spoljnim pitanjima,
- **Mirko Baković** – za člana Komisije o spoljnoj trgovini i carinama i člana Komisije o saobraćaju i komunikacijama,
- **Ivica Pašalić-Lhotak** – za člana Komisije o spoljnoj trgovinii i carinama,

- **Anita Mikulić** – za člana Komisije o pitanjima finansija i budžeta,
- **Hilmo Neimarlija** - za člana Komisije o ustavnim i pravnim pitanjima,
- **Halid Genjac** – za člana Komisije o međunarodnim i spoljnim pitanjima i člana Komisije o administrativnim pitanjima,
- **Rijad Raščić** – za člana Komisije za spoljnu trgovinu i carine i Komisije o pitanjima finansija i budžeta,
- **Raifa Alagić** – za člana Komisije o saobraćaju i komunikacijama.

#### **Ad – 4: Odgovori na poslanička pitanja i pitanja poslanika**

Poslanička pitanja postavili su poslanici:

##### **Ivo Divković:**

Da li je tačna informacija da je ambasador BiH pri Ujedinjenim nacijama bio uhapšen u SAD i da je oslobođen pozivajući se na diplomatski imunitet?

##### **Rasim Kadić:**

Ponovo postavio ranije pitanje na koje nije dobio odgovor:

1. Šta MIP i drugi nadležni organi u BiH poduzimaju sa ambasadama stranih zemalja u BiH na civilizacijskom uređenju prostora za čekanje na dobijanje viza u Sarajevu, kako bi građani zadržali bar minimum dostojanstva u višesatnim i višednevnim čekanjima po kiši, snijegu i suncu?

2. Da li će OSCE, na bazi pravila o tzv. minimumu odsustva sa sjednice izabranih zvaničnika u parlamentima, oduzeti poslanički mandat poslanicima koji u kontinuitetu duže vremena ne prisustvuju sjednicama Predstavničkog doma?

##### **Miodrag Deretić:**

Ponovo postavio ranija pitanja na koja nije dobio odgovore:

1. Kada će Republici Srpskoj biti namirena teritorija na 49% kako je to predviđeno Dejtonskim mirovnim sporazumom?

2. Da li se nadležnosti gospodina Roberta Faranda, supervizora za Brčko, mogu proširivati van bivše Opštine Brčko, odnosno sada Distrikta Brčko?

3. Kada će sportistima Republik Srpske biti omogućeno da učestvuju na zvaničnim takmičenjima (svjetskim, evropskim, Balkanskom šampionatu i ostalim) pod pokroviteljstvom zvaničnih sportskih asocijacija?

##### **Branko Dokić:**

Iznio jedan protest i postavio jedno pitanje:

1. Protest – zašto nije dobio odgovor na postavljeno pitanje MIP-u, da li postoje kriterijumi za koje praznike se organizuje prijem u DKP-ovima širom svijeta? Da li za entitetske ili BiH-praznike? (Povod – “organizovanje prijema za nekakav praznik 1. mart”).

2. Pitanje – Kojim se to poslovima bavi kontroverzni Šaćirbej i u koje je to on projekte uključen kao predstavnik BiH u Ujedinjenim nacijama? (Povod Izjava Šaćirbeja koju je prenio nedjeljnik “Reporter”: “Posao kojim se bavim, kao i specifični projekti u

koje sam uključen, pružaju nekim pojedincima bezbroj motiva. Strah me je, ustvari, od razotkrivanja ko stoji iza ove šeme”).

**Ibrahim Spahić:**

1. Zatražio informaciju o provedbi Okvirnog zakona o privatizaciji u BiH.
2. Zatražio izvještaj Agencije za statistiku, koja tretira cijelu BiH, o stanju u društvu, privredi i svim drugim oblastima.
3. Zatražio od nadležnog organa informaciju o zaštiti nacionalnih manjina u BiH.

**Mediha Filipović:**

Ponovo postavila ranije pitanje: Da li se nešto radi na ukidanju viza za naše građane za zemlje potpisnice Pakta stabilnosti i na ublažavanju viznog režima za zemlje članice Vijeća Evrope. Pitanje dopunila sa zahtjevom da se ispita mogućnost, odnosno da se ministarstva potrudu da se pokuša ukinuti vizni režim barem za studentsku omladinu BiH.

**Mara Perkanović:**

Kada će u Zakonu o privatizaciji stanova u Federaciji BiH biti ukinuta diskriminacija kod otkupa stanova, gdje izbjeglice, povratnici, a odnosi se na 99% Srba, moraju provesti najmanje dvije godine da bi dobili pravo na otkup stana na kojem imaju stanarsko pravo? Kada će biti usklađen sa istim zakonom u Republici Srpskoj?

Pitanja u pisanoj formi dostavili su poslanici:

**Sejfudin Tokić:**

Parlamentarna skupština donijela je jednoglasno zaključak o izdvajanju jednog paušala u Fond za deminiranje. Koji poslanici nisu ispoštovali navedeni zaključak?

**Munira Karić:**

Kakva je sudbina zarobljenih muškaraca u selu Novoselci, Opština Sokolac, 22.9.1992. godine, starosne dobi od 15-82 godine, njih 44 (familije Karić, Selimović, Oćuz, Kabaš, Čolić)?

Poslije postavljenih poslaničkih pitanja prvi zamjenik predsjedavajućeg g. Halid Genjac je, u svojoj kraćoj diskusiji, istakao da je rijetko koja sjednica Predstavničkog doma imala zanačaj kakav je imala ova, jer je usvojen stalni Poslovnik. Naglasio je da je u izradi Poslovnika učestvovao veliki broj poslanika i da je pri tome ispoljena atmosfera tolerancije, uvažavanja stavova i međusobnog uvažavanja poslanika. Izrazio je zahvalnost predstavnicima OHR i FARE projekta na učestvovanju i davanju korisnih sugestija na izradi Poslovnika.

Predsjedavajući Pero Skopljak pridružio se riječima Halida Genjca i svima se zahvalio na kooperativnosti.

Ovim je završena 20. sjednica Predstavničkog doma.

Sastavni dio ovog zapisnika je magnetogram 20. sjednice Predstavničkog doma.

PREDSJEDAVAJUĆI  
PREDSTAVNIČKOG DOMA  
**mr. Pero Skopljak**